

## В ПЯТОК ВАИЙ ВЕЧЕРА,

Во светильничное обычное стихословие.

На Господи возвах, поставим стихов, 10. И поем самогласен дне, и мученичен: и праведнаго Лазаря самогласных, творяще я семь.

Самогласен, глас 8,

Душеполезную совершивше Четыредесятницу, \* и святую седмицу страсти Твоя, \* просим видети Человеколюбче, \* еже прославити в ней величия Твоя, \* и неизреченное нас ради смотрение Твое, \* единомудренно воспевающе: \* Господи слава Тебе. [Дважды.]

Мученичен: Мученицы Господни \* молити Бога нашего, \* и испросите душам нашим множество щедрот, \* и очищение многих прегрешений, молимся.

Таже поем святаго Лазаря, самогласны 7. Творение благочестиваго царя, господина Льва Премудраго. Глас 6.

Господи, Лазарев хотя гроб видети, \* волею хотяй во гроб вселитися вопрошал еси: \* где положите его? \* Уведев же, еже не неведал еси, \* и возглашал, егоже любил еси: \* Лазаре гряди вон. \* И послуша бездыханный, \* дыхание дающего ему, \* Тебе Спаса душам нашим. [Дважды.]

Господи, на гроб четверодневнаго пришел еси Лазаря, \* и над гробом слезы пролив, \* мертвеца четверодневна возставил еси, \* класе живота. \* Темже смерть связана бысть гласом: \* пелены разрешишася руками. \* Тогда радости исполнися множество ученик, \* и едино от всех служашеся согласие: \* благословен еси Спасе, помилуй нас. [Дважды.]

Господи, глас Твой разруши адово царствие, \* и слово власти Твоя возстави из гроба четверодневнаго, \* и бысть Лазарь пакибытия проображение спасительное. \* Вся возможна Тебе Владыко всех Царю, \* даруй рабом Твоим очищение, \* и велию милость.

Господи, уверити хотя учеником Твоим \* из мертвых Твое Воскресение, \* на гроб Лазарев пришел еси: \* и возгласившу Ти сего, \* ад пленися, и отпусти четверодневна, \* вопиюща Тебе: \* благословенный Господи слава Тебе.

Господи, поемь ученики Твоя, \* в Вифанию пришел еси, \* да возставиши Лазаря: \* и прослезився над ним законом естества человека, \* яко Бог того четверодневна воздвигл еси, \* и вопияше Ти Спасе: \* благословенный Господи слава Тебе.

Слава, глас 8:

Представ гробу Лазареву Спасе наш, \* и возгласив мертваго, \* яко от сна воскресил еси: \* оттрясе тление нетления манием, \* и изыде словом, связанный укройми. \* Вся можеш, вся Тебе \* работают Человеколюбче, \* вся повинуются Ти, \* Спасе наш слава Тебе.

И ныне, глас 8:

Душеполезную совершивше Четыредесятницу, возопиим: \* радуйся граде Вифание, отечество Лазарево. \* Радуйтесь Марфа и Мариа, \* того сестры, завтра бо Христос приходит, \* оживити глаголом умершаго брата: \* Егоже глас услышав, горький и несытый ад, \* страхом вострепетав, и вельми возстенав, \* отпустит Лазаря укройми обязана: \* Егоже чудеси собор еврейский удивився, \* с ваием и ветвьми Того срящут, \* и явятся похваляющии дети, \* Емуже завидят отцы. \* Благословен грядый во имя Господне Царь Израилев.

Вход. Свете тихий:

Прокимен, псалом 123, глас 6: Помощь наша во имя Господа, сотворшаго небо и землю.

Стих: Яко аще не Господь бы был в нас, да речет убо Израиль.

Бытия чтение. [Глава 49, ст. 33, глава 50, ст. 1 – 26.]

Преста Иаков завещая сыном своим: и возложив Иаков нозе свои на одр, умре, и приложися к людем своим. И припад Иосиф на лице отца своего, плакася [горько] о нем, и облобыза его. И повеле Иосиф рабом своим погребателем погребсти отца своего: и погребоша погребатели Израиля. И исполнишася ему четыредесять дней, тако бо исчисляются дние погребения: и плакася его Египет седмьдесят дней. Егда же преидоша дние плача, глагола Иосиф к вельможам фараоновым, глаголя: аще обретох благодать пред вами, рцыте о мне во уши фараону, глаголюще: отец мой закля мя прежде скончания [своего], глаголя: во гробе, егоже ископах себе в земли Ханаани, тамо мя погреби ныне убо возшед погребу отца моего, и возвращуся. и рекоша фараону по словеси Иосифову. И рече фараон к Иосифу: взыди, погреби отца твоего, якоже закля ты. И взыде Иосиф погребсти отца своего: и совзыдоша с ним вси раби фараони, и старейшины дому его, и вси старейшины земли Египетския. И весь дом Иосифов, и братия его, и весь дом отца его, и сродницы его: овцы же и волы оставиша в земли Гесем. И совзыдоша с ним и колесницы и конницы, и бысть полк велик зело. И приидоша на гумно Атадово, еже есть об он пол Иордана, и рыдаша его рыданием велиим и крепким зело: и сотвори плачь отцу своему седмь дней. И видеша жители земли Ханаанския плач на гумне Атадове, и реша: плач велик сей есть египтяном: сего ради наречеса имя месту тому, Плач Египетск, еже есть об он пол Иордана. И сотвориша ему тако сынове его, якоже заповеда им. И взяша его сынове его, в землю Ханааню: и погребоша его в пещере сугубей, юже стяжа Авраам, пещеру в стяжание гроба от Ефрона Хеттеанина, прямо Мамврии. И возвратися Иосиф во Египет, сам и братия его, и вси совозшедшии погребсти отца его. Видевше же братия Иосифовы, яко умре отец их, реша: да не когда воспомянет злобу нашу Иосиф, и воздаянием воздаст нам за вся злая, яже показахом ему. И пришедше ко Иосифу, рекоша: отец твой закля прежде кончины своя, глаголя: Тако рцыте Иосифу: остави им неправду и грех их, яко лукавая тебе показаша, и ныне прими неправду рабов Бога отца твоего. и плакася Иосиф, глаголющим им к нему. И пришедше к нему рекоша: се мы тебе раби. И рече к ним Иосиф: не бойтесь, Божий бо есмь аз. Вы совещасте на мя злая, Бог же совеща о мне во благая, дабы было якоже днесь, и препиталися бы людие мнози. И рече им: не бойтесь, аз препитаю вас, и дома ваши. и утеши их, и глагола им по сердцу их. И вселися Иосиф во Египте сам и братия его, и весь дом отца его: и

поживе Иосиф лет сто десять. И виде Иосиф Ефремля дети до третьяго рода: и сынове Махира сына Манассиина родишася при бедрах Иосифовых. И рече Иосиф братии своей, глаголя: аз умираю: посещением же посетит вас Бог, и изведет вас от земли сея в землю, о нейже клятся Бог отцем нашим, Аврааму, Исааку, и Иакову. И закле Иосиф сыны Израилевы, глаголя: в посещении, имже посетит вас Бог, совознесите и кости моя отсюда с вами. И скончася Иосиф сый лет ста десяти: и погребоша его, и положиша в раце во Египте.

**Прокимен, псалом 124, глас 4: Надеющиеся на Господа, яко гора Сион не подвижится во век.**

**Стих: Яко не оставит Господь жезла грешных на жребий праведных.**

**Притчей чтение. [Глава 31, ст. 8 – 32.]**

**С**ыне, отвержай уста твоя слову Божию, и суди вся здраво. Отвержай уста твоя, и суди праведно, разсуждай же убога и немощна. Жену доблю кто обрящет, дражайши есть каменя многоценнаго таковая. Дерзает на ню сердце мужа ея: таковая добрых корыстей не лишится. Делает бо мужу своему благая во все житие. Обретши волну и лен, сотвори благопотребное руками своима. Бысть яко корабль куплю деющих, издавеча собирает себе богатство. И востает из нощи, и даде брашна дому, и дела рабыням. Узревши село купи: от плодов же рук своих насади стяжание. Препоясавши крепко чресла своя, утвердит мышцы своя на дело. И вкуси, яко добро есть делати, и не угасает светильник ея всю ночь. Лакти своя простирает на полезная, руке же свои утверждает на вретено. И руке свои отверзает убогому, длань же простре нищу. Не печется о сущих в дому муж ея, егда где замедлит: вси бо у нея одеяни суть. Сугуба одеяния сотвори мужу своему, от виссона же и порфиры себе одеяния. Славен бывает во вратех муж ея, внегда аще сядет в сонмищи со старейшины жителями земли. Плащаницы сотвори, и продаде финикианом, опоясания же хананеом. Уста своя отверзе внимательно и законно, и чин заповеда языку своему. Крепостию и лепотою облечеса, и возвеселися во дни последния. Тесны стези дому ея: брашна же леностнаго не яде. Уста своя отверзе мудро и законно: Милостыня же ея возстави чада ея, и обогатишася: и муж ея похвали ю. Многи дщери стяжаша богатство, многи сотвориша силу: ты же предупела и превознеслася еси над всеми. Ложнаго угождения, и суетныя доброты женския несть в тебе: жена бо разумная благословена есть. страх же Господень сия да хвалит. Дадите ей от плодов устен ея, и да хвалимь будет во вратех муж ея.

**И прочее последование Преждеосвященных яко обычно.**

**Ведомо буди, яко от днесь ниже мученичен, ниже Богородичен, ниже Осмогласник поется, даже до субботы святого Фомы.**

## **В ТОЙЖЕ ПЯТОК ВАИЙ**

### **ПОВЕЧЕРИЕ ГЛАГОЛЕМ ВЕЛИКОЕ.**

На Повечерии поем настоящий канон, творение святого отца господина Андреа  
Критского, Иерусалимиты. Глас 1.

#### Песнь 1.

**Ирмос:** Песнь победную поим вси Богу, \* сотворшему дивная чудеса, \* мышцею высокою, \* и спасшему Израиля, \* яко прославися.

**Припев:** Слава Тебе Боже наш, слава Тебе.

**М**ертва четверодневна воскресив Спасе мой Лазаря, тли изменил еси мышцею высокою, и показал еси яко сильный власть Твою.

**В**озгласив Лазаря из гроба, абие воскресил еси: но ад доле горце рыдаше, и стена трепеташе, Спасе, власти Твоея.

**П**рослезился еси Господи, над Лазарем, показуя воплощение смотрения Твоего, и яко естеством Бог сый, естеством по нам был еси Человек.

**М**арфины слезы и Мариины утолил еси Господи, из мертвых Лазаря воскресив Спасе, и показав одухновенна мертваго властию Твоею.

**З**аконом естества человека вопрошил еси Владыко: где положен бысть Лазарь? Показуя всем Спасе, истинное еже к нам смотрение Твое.

**З**аклепы сокрушил еси тогда адовы, возгласив Лазаря, и державу стрясл еси борца, и покорил еси прежде Креста, трепетати Тебе едине Спасе.

**С**вязня Лазаря, от ада держимаго Владыко, яко Бог предварил еси, и разрешил еси от уз: к Твоему бо вся Сильне, идут повелению.

**Слава:** Отца прославим, Сына, и Духа, Троицу нераздельную, во Единице Естества, и со ангелы Ю, яко единого несозданнаго Бога славословим.

**И ныне, Богородичен:** Непреложно родила еси Дево Мати Создателя естества, от Святого Духа по благоволению Отчу бывша еже есмы, кроме изменения и смешения.

#### Песнь 2.

**Ирмос:** Вонми небо и возглаголю, \* и воспою Христа, \* единого Человеколюбца.

**С**лава Тебе возгласившему токмо, и из гроба мертва четверодневна друга воздвигшему Лазаря.

**У**слыша гласа Твоего бездушный, и одушевлен от мертвых воста абие, славя Тя Господи.

**П**овеление живоноснаго гласа Твоего приим, смердящий воста от гроба, Спасе мой, Лазарь.

**П**рослезился еси над другом Спасе мой, уверяя наше, якоже носил еси, естество, и сего воскресил еси.

**В**острепета якоже виде ад, паки текуща абие связана укройми, гласом к здешнему животу.

**У**жасошася еврейстии народи егда возгласив Спасе, воскресил еси словом смердящаго Лазаря.

**С**отрясошася сокровища адова, яко одушевлен бысть абие низу Лазарь, тогда гласом Оживившаго.

### Песнь 3.

**Ирмос:** Камень, егоже небрегоша зиждущии, \* сей бысть во главу угла. \* Той есть камень, \* на немже утверди Церковь Христос, \* юже от язык искупи.

**Ч**удо странное и преславное, како Создатель всех, еже не неведяше, яко не ведый вопрошаше: где лежит, егоже рыдаете? где погребесе Лазарь, егоже помале из мертвых жива вам воскрешу Аз?

**К**амень, егоже тебе привалиша погребшии тя, сего взяти Иисус повелев, абие воскресил тя, возгласив тебе: Лазаре востани, гряди ко Мне, да твоего ад устрашится гласа.

**М**арфа и Мариа Господи, рыданьми вопиясте: се егоже любил еси четверодневен смердит: аще бы еси был зде, тогда не бы умерл Лазарь. Но яко неразлучен везде, сего абие возгласив воздвигл еси.

**П**ролив над другом слезы смотрения ради, показал еси плоть от нас вземлемую, существом не мнением Спасе, соединившуюся Тебе, и яко Человеколюбец Бог, сего абие возгласив воздвигл еси.

**У**вы мне воистинну, ныне погибох, вопияше ад, сиче возглашаше смерти глаголя: се Назорянин дольняя подвиза, и утробу мою посекая, бездыханна мертва возгласив воздвиже.

**Г**де еврейское безумие? где неверие? доколе чуждии, доколе лестцы, зрите умершаго гласом исходяща, и не веруете Христу, воистинну сынове тьмы вси вы.

**Слава:** Единого от Троицы вем Тя, аще и воплотился еси, единого и славлю, Сына воплощенна, от Богородицы безсеменно прозябшаго, и со Отцем и Духом единого Сына славословима.

**И ныне, Богородичен:** Странное и страшное видение смотрения, еже предзреша неложнии пророцы Деву Богородицу: безсеменно убо заченшую, и нетленно рождшую Бога, пребывающую же по рождестве Чистую.

### Песнь 4.

**Ирмос:** Взятся солнце, \* и луна ста в чине своем, \* вознеслся еси Долготерпеливе на Древо, \* и водрузил еси на нем \* Церковь Твою.

**П**рослезился еси Господи над Лазарем, показав яко Человек еси, и воздвигл еси Владыко умершаго, и показал еси людем, яко Сын еси Божий.

**Б**ездыханный услыша повеление Твое, гряди вон Лазаре, текий восташе с пеленами, и скакаше, Блаже, показуя державу Твою.

**М**арфины слезы и Мариины утолил еси Христе Боже, возгласив Лазаря самовластно, воздвигл еси гласом, и поклонися Тебе.

**П**рослезився яко Человек над Лазарем, воздвигл еси его яко Бог. Вопросил еси: где погребесе четверодневный? уверяя Блаже, вочеловечение Твое.

**Страсти** знамения и Креста Твоего, уверяти хотя Блаже, адово несытное чрево растерзав, возставил еси яко Бог четверодневнаго.

**Кто** виде, кто слыша, яко воста человек мертвый смердящий? Илиа убо воздвиже и Елисей, но не от гроба, но ниже четверодневна.

**Поем** Твое Господи, могутство, поем и страсти Христе: онем бо яко благоутробен чудодействовал еси, сими же смотрительно ят еси яко Человек.

**Бог** еси и Человек, истинствуяй вещьми и имены, предстал еси гробу плотию Слове, и воздвигл еси яко Бог четверодневнаго.

**Ужасошася** Владыко, еврейстии народи, яко видеша воставша мертва из гроба Лазаря со гласом Твоим, и пребыша непокорливи чудесем Твоим.

**Слава:** Безначально возсиял еси от Отца Твоего, яко един сый от Троицы Спасе, в лето в Дусе из девственных Ты прошел еси кровей, плоть взял Пресущественный.

**И ныне, Богородичен:** Зачатие безсеменное Богородицы, рождество кроме страсти тления: Бог бо обоя чудодействовавый истоци Себе, да нам соединится.

#### Песнь 5.

**Ирмос:** Твой мир даждь нам Сыне Божий, \* иного бо разве Тебе бога не знаем, \* и имя Твое именуем, \* яко Бог живых и мертвых еси.

**Жизнь** сый Господи, и свет истинный, Лазаря возгласив воскресил еси: яко силен бо всем показал еси, яко Бог живых и мертвых еси.

**Нестерпимое** Твое повеление Иисусе, не терпя ад многих приемый убояся, и четверодневна суца Лазаря, со гласом жива, а не мертва даяше.

**Персть** совокупль духу, древле брение Духом жизни, одушивый Слове словом Твоим: и ныне же словом воскресил еси от тли друга из преисподних.

**Манию** Твоему Господи, сопротивися никтоже: егда бо мертваго гласил еси Лазаря, абие бездыханный воставаше, и узы нося, ногама хождаше.

**О** иудейское безумие! о омрачение врагов! кто виде мертвеца из гроба встающа? Илиа древле воскреси, но не от гроба, но ниже четверодневна.

**Непобедиме,** долготерпеливе, вся нас ради творяй яко Бог, и терпяй яко Человек, причастники вся ны сотвори Царствия Твоего, молитвами Лазаревыми.

**Слава:** Пребезначальная, собезначальная, единочестная Троице, Отче Вседержителю, и Сыне, и Душе Святой, Единице Святая триипостасная, суция от Адама спасай, верно Тя воспевающия.

**И ныне, Богородичен:** Пречистое чрево Твое освяти Чистая, плоть из него приемый Пребожественный, в Троице покланяемый, из Отца Слово, и с Духом Бог.

#### Песнь 6.

**Ирмос:** Отвергла мя еси \* во глубины сердца морскаго, \* и спасл еси мя Спасе от работы смертныя, \* и разрешил еси узы \* беззаконий моих.

**Вопросил** еси: где есть? вся ведый, прослезился же еси Спасе, яко Человек естеством, воздвигл мя еси мертва повелением Твоим.

**Возгласил** мя еси Спасе, из ада преисподняго, вопиет Лазарь к Тебе разрушителю ада, и воздвигл мя еси мертва повелением Твоим.

**О**деял мя еси Спасе, в брнное тело, и вдохнул ми еси жизнь, и видех свет Твой, и воздвигл мя еси мертва повелением Твоим.

**О**душил еси Ты, бездыханный образ плоти моя Спасе, стягнул мя еси костью и жилами, и воздвигл мя еси мертва повелением Твоим.

**В**сесннное растерзав чрево адово, исторгнул мя еси Спасе, Твоею властью, и воздвигл мя еси мертва повелением Твоим.

**Н**осил еси Спасе, смешение мое всецело: сохранил же еси чисту пречистую утробу, из неяже прошел еси воплотився, един сый Троицы.

**Слава, Троицен:** Троице Святая, прославляю Твое благоутробие, и со ангелы пою трисвятую песнь: помилуй души нас воспевающих Тя.

**И ныне, Богородичен:** **В** пречистую Твою утробу вниде Слово, соблюде же паки по рождестве сию чистую, Богородительнице, чудо воистинну преславное.

### Песнь 7.

**Ирмос:** Сущим в печи отроком Твоим Спасе, \* не прикоснуса, ниже стужи огонь. \* Тогда трие, яко единеми усты пояху, \* и благословляху глаголюще: \* **благословен Бог отец наших.**

**Н**ад мертвецем прослезился еси Спасе Человеколюбче: да покажеши всем людем, яко Бог сый, нас ради Человек явился еси, и волею прослезился еси, образы нам предлагая сердечныя любве.

**Ч**етверодневный Лазарь Спасе, яко услыша низу глас Твой, востав воспе Тя, и радуясь сице вопияше: Ты Бог и Создатель мой, Тебе поклоняюся, и пою воскресившаго мя.

**А**ще и узами обложен есмь, Лазарь низу вопияше Свободителю: но никакоже во чреве пребуду адове, аще токмо воззовеши мя, Лазаре, гряди вон: Ты бо свет мой и живот.

**М**олю тя Лазаре, ад рече, востани, изыди от заклепов моих скоро, отыди убо: добро бо мне одинаго рыдати горце отъемлема, нежели всех, ихже прежде алча поглотих.

**О** что косниши Лазаре, глаголет, гряди вон, зовет стоя Друг твой: изыди убо, да и аз ослабу приму, отнележе бо тя сндох, на блевание пища устроися ми.

**Ч**то не востанеши Лазаре скоро, воззва из долу ад рыдая? что не абие воскрес течеши отсюду? Да не и других ми пленит Христос, воскресив тя.

**У**дивляемь был еси Владыко Христе, чудная тогда соделав многая, свет бо слепым, глухим же уши отверзл еси словом, и друга Лазаря из мертвых, яко Бог возгласив воздвигл еси.

**Слава, Троицен:** Троическую воспоим песнь, славяще безначальнаго Отца, и Сына, и Духа Праваго, единственное едино Существо, еже Троически воспоим: Свят, Свят, Свят еси Троице.

**И ныне, Богородичен:** Яко одинаго от Троицы Тя Христе славим, яко от Девы воплощься, кроме преложения человечески вся претерпел еси, не отступль естества отческа Иисусе, аще и соединился еси нам.

### Песнь 8.

**Ирмос:** Небеса небес, \* и вода яже превыше небес, \* благословите, пойте Господа, \* и превозносите Его во веки.

**Т**ворец и Содержитель всех, за милосердие во Вифанию прииде, воздвигнути Лазаря.

**Ч**етверодневный смердя, и повойми обязан, изменися дыханием бездыханный, возгласившу Ти Господи.

**И**удейстии людие, яко видеша умершаго, Твоим гласом воставша Христе, распыхахуся.

**О**мраченнии о свете иудее, что не веруете Лазареву востанию, Христову начинанию?

**Д**а радуется Сион, и да поет Жизнодавца, воскресившаго словом от гроба Лазаря.

**В**ои небеснии, и род земных воспеша Тя, егда Спасе мой Лазаря воздвигл еси.

**Слава:** Со Отцем и Сыном Духа славословлю и поя немолчно зываю: Трисвятый, слава Тебе.

**И ныне, Богородичен:** Тебе благословлю и покланяюся Рождшемуся из Девы, не разлучшюся престола святяя славы Твоея.

### Песнь 9.

**Ирмос:** Сотвори державу мышцею Своею: \* низложи бо сильныя со престол, \* и вознесе смиренныя Бог Израилев. \* В нихже посети нас Восток с высоты, \* и направил ны есть на путь мира.

**Д**а поет чудо Вифания с нами: в ней бо прослезися Создатель, законом естества плоти, Лазаря воскрешая, и Марфины слезы прочее, и плач Мариин в радость прелагая, мертвеца воздвигл есть.

**У**веряя Слове, Воскресение Твое, призвал еси Лазаря из гроба, и воздвигл еси яко Бог, да покажеши людем Бога же и Человека вкупе воистинне суща, и воздвигша храм телесе Твоего.

**С**трясл еси врата и верей железныя, устрашил еси ад гласом Твоим, ужасеся же с ним и смерть абие, яко видеша Лазаря Спасе, суща в них узника, одушевленна гласом и воскресша.

**У**жасошася вси, яко видеша Тя Спасе слезяща, Лазаря умерша, и глаголаху народи: виждь, како его любляше. Абие убо возгласил еси его, и востав бездыханный, отложи тление повелением Твоим.

**П**отрясошася врата, сокрушишася верей, разрешишася узы мертваго гласом силы Христовы, и ад горько въздыхаше рыдая, и своим вопияше: увы мне, кий и откуду глас оживляй мертвья?

**В**остани отсюда послушав гласа, Друг бо твой вон приглашает тя: Сей есть прежде воскресивый мертвья. Илиа убо воздвиже мертва, и Елисей купно: но Сей бе онеми и глаголай и действуй.

**П**оем Твою Слове непобедимую крепость: костьми бо и жилами умерша воздвигл еси словом Твоим, яко всех Создатель, и сего воскресил еси Спасе, от преисподних, якоже вдовья сына суща на одре.



**Слава:** Троице Всевятая, Отче безначальный Боже, собезначальный Сыне и Божественный Слове, Утешителю Благий, Душе Святой Божий: единый и трисолнечный Свете, соестественное Существо, едина Боже и Господи, ущебри мир.

**И ныне, Богородичен:** Вся сотворивый в премудрости Иисусе, и во всего мя оболкийся из Девы, и весь пребываяй присно в недрах Отца: Святой Дух Твой Христе, на стадо Твое низпослав яко Бог, осени нас.

**Вместо Достойно:**

**Ирмос:** Сотвори державу мышцею Своею: \* низложи бо сильныя со престол, \* и вознесе смиренныя Бог Израилев. \* В нихже посети нас Восток с высоты, \* и направил ны есть на путь мира.

На Полунощнице, на первом Трисвятом, по Отче наш: Тропарь: Общее воскресение: На последнем Трисвятом, по Отче наш: Кондак: Всех радость Христос: Господи помилуй, 12. И отпуст. Молитвы же: Помяни Господи, не глаголем.

## В СУББОТУ СВЯТАГО И ПРАВЕДНАГО ЛАЗАРЯ

### НА УТРЕНИ

На Бог Господь, тропарь, глас 1:

Общее воскресение \* прежде Твоя страсти уверяя, \* из мертвых воздвигл еси Лазаря Христе Боже. \* Темже и мы яко отроцы победы знамения носяще, \* Тебе победителю смерти вопием: \* осанна в вышних, благословен Грядый во имя Господне. [Трижды.]

Таже, стихословие: Рече Господь Господеви моему:

По 1-м стихословию седален, глас 1:

Подобен: Камени запечатану:

Ущедрив Марфины и Мариины слезы, \* отвалити камень от гроба повелел еси Христе Боже, \* воскресил еси возгласив мертвого, \* мира Жизнодавче, Собою уверяя воскресение. \* Слава силе Твоей Спасе: \* слава власти Твоей: \* слава словом вся Составившему.

Слава, и ныне, тойже.

Таже стихословим Непорочны.

И поем тропари воскресны: Благословен еси Господи:

Ангельский собор: И прочая, яко обычай есть в Неделю,

Потом седален, глас 5.

Подобен: Собезначальное Слово:

Источник премудрости и предведения, \* во Вифанию пришел, \* с Марфою сущих вопрошал еси: \* где положисте, рек, друга, Лазаря? \* Егоже ради прослезив Благоутробне, \* четверодневна мертва воскресил еси \* гласом Твоим Человеколюбче и Щедрый, \* яко Жизнодавец и Господь.

Слава, и ныне, тойже.

Таже глаголем: Воскресение Христово: и псалом 50. Евангелие же не чтем, токмо во храме святого Лазаря. Чтение же творим, толкование еже от Иоанна Евангелиа того дне, слово 63, и 64.

Канона два, до шестыя песни, творение господина Феофана: отонудуже начинаем четверопеснец. Первый канон со ирмосом на 8: другий на 6. Глас 8.

Песнь 1.

**Ирмос:** Поим Господеви проведшему люди Своя \* сквозе Чермное море, \* яко един славно прославися.

Лазаря умершаго, манием Божественным воскресил еси, яко Создатель сый, и живота сокровище Человеколюбче.

Словом четверодневнаго Лазаря возгласил еси бессмертне, темнообразное адово разрушив крепостию царство.

Всем Пребожественнаго познание Божества показал еси, из мертвых возставив четверодневнаго Лазаря Владыко.

Днесь Вифания предвозвещает Воскресение Христа Жизнодавца, востанием Лазаревым ликовствующи.

Другий канон, творение Иоанна монаха. Глас 8.

**Ирмос:** Воду прошед яко сушу, \* и Египетскаго зла избежав, \* израильтянин вопиаше: \* Избавителю и Богу нашему поим.

Прежде от не сущих привел всяческую тварь, и ведый сердечная сокровища предлаголеши яко Владыка учеником Лазарево успение.

Человека естеством осуществовавыйся Христе от Девы, Лазарево Ты погребение навикнути вопрошал еси яко Человек, не неведый яко Бог, идеже лежаше.

**Слава:** Уверяя Слове Твое Воскресение, воистинну яко от сна, любимаго воскресил еси уже смердяща, четверодневна мертвеца от гроба.

**И ныне, Богородичен:** Чини Тя ангел и человек, безвестная Мати, хвалят непрестанно: Создателя бо сих якоже Младенца, во объятиих Твоих носила еси.

**Катавасия:** Воду прошед яко сушу, \* и Египетскаго зла избежав, \* израильтянин вопиаше: \* Избавителю и Богу нашему поим.

Песнь 3.

**Ирмос:** Ты еси утверждение \* притекающих к Тебе Господи, \* Ты еси свет омраченных, \* и поет Тя дух мой.

Ава предлагая действия Твоя, показал еси существ Спасе сугубство: Бог бо еси и Человек.

Бездна сый разума, Ты вопрошаеши: где положиши мертвый? хотя воскресити Животодавче лежащаго.

Места преходяй яко быв Человек, явился еси описан, исполняя всяческая, яко Бог неописанный.

Лазаря воздвигл еси Божественным Христе глаголом: и мене многими прегрешеньми умерша возстави, молюся.

Иный.

**Ирмос:** Небеснаго круга \* верхотворче Господи, \* и Церкви Зиждителю, \* Ты мене утверди в любви Твоей, \* желаний краю, верных утверждение, \* едина Человеколюбче.

Представ Ты гробу чудотворче Господи, в Вифании над Лазарем прослезился еси, законом естества, плоть Твою уверяя, Иисусе Боже мой, юже восприял еси.

Мариин плач Ты абие утолил еси Спасе, и Марфе показуя самовластное. Ты бо воскресение, Ты и живот, якоже рекл еси: истина бо еси, и всех Господь.

**Слава:** Обвитаго укройми любимаго Лазаря Господи, от ада темнаго исхитил еси Ты, словом Твоим всемогущим смерти разверг заклёпы же и царствия.

**И ныне:** Вселился еси в Деву плотски Господи, явился еси человеком, якоже леть бе видену Тебе быти: Юже и показал еси яко истинную Богородицу, и верных помощницу, едина Человеколюбче.

**Катавасия:** Небеснаго круга \* верхотворче Господи, \* и Церкви Зиждителю, \* Ты мене утверди в любви Твоей, \* желаний краю, верных утверждение, \* едина Человеколюбче.

Седален, глас 4.

**Подобен:** Удивися Иосиф:

**В**купе предстаете Христу Лазареве сестре, и слезяще горце, и плачуще его, реша Ему: Господи, умре Лазарь. Он же яко Бог не неведый погребания, вопрошаше яко Человек: где положите его? И приступив ко гробу, возглашаше четверодневнаго Лазаря. Он же абие воста, и покланяшеся Воскресившему.

**Слава, и ныне, глас 8.**

**Подобен:** Премудрости:

**П**роведый всяческая яко Творец в Вифании прорекл еси учеником Твоим: друг наш Лазарь успе днесь. И ведый вопросил еси, рекл: где положите его? И Отцу помолился еси, прослезився яко Человек: темже и возгласив, егоже любил еси, от ада возставил еси Господи четверодневнаго Лазаря. Сего ради вопиеш Тебе: прими Христе Боже, дерзающих приносить хваление Тебе, и сподоби всех славы Твоея.

**Песнь 4.**

**Ирмос:** Услышах Господи, \* смотрения Твоего таинство, \* разумех дела Твоя, \* и прославих Твое Божество.

**Н**е пособника требуяй, но смотрения совершаяй неизреченное, моляся возставил еси мертва, четверодневнаго Всесильне.

**О**тцу соприносущное Слово, и Бог прежде зримый, ныне яко Человек молится, молитвы всех Приемляй.

**Г**лас Твой разруши Спасе смертную всю силу, основания же адова Божественною Твоею силою поколебашася.

**Богородичен:** Деву воспоим, яко по рождестве Деву пребывшую, и рождшую Христа Бога, от прелести мир избавльшаго.

**Иный.**

**Ирмос:** Ты моя крепость Господи, \* Ты моя и сила, \* Ты мой Бог, Ты мое радование, \* не оставль недра Отца, \* и нашу нищету посетив, \* тем с пророком Аввакумом зову Ти: \* силе Твоей слава Человеколюбче.

**Т**ы яко пастырь исхитил еси Христе человека, растлевша уже четверодневна, Зиждителю, от волка лютаго воистинну и всеядца: яко всемогущи и Господь, сим проявляя всемирную славу, Твоего ныне тридневнаго востания.

**Т**я жизнь видяще сущии с Марфою Христе, вопияху: аще бы был еси зде Господи, просвещение всех и жизнь, отнюд не бы умерл, мертв не явился бы Лазарь. Жизнь же умерших, Ты Человеколюбче сый, в радость плач их прелагаеши.

**Слава:** Ты источника бояться Господи бездны, Тебе работают воды всяческие: Тебе трепещут Христе верей адовы, и заклеты державою Твоею разрушаются, Лазарю воскресшу из мертвых гласом Твоим, всемогущи Спасе Человеколюбче.

**Богородичен:** Ты верным похвала еси Безвестная, Ты предстательство, Ты и прибежище христианом, стена и пристанище: к Сыну бо Твоему моления приносиши Всенепорочная, и спасаеши от бед, верою и любовию Богородицу Чистую Тя ведущия.

**Катавасия:** Ты моя крепость Господи, \* Ты моя и сила, \* Ты мой Бог, Ты мое радование, \* не оставь недра Отча, \* и нашу нищету посетив, \* тем с пророком Аввакумом зову Ти: \* силе Твоей слава Человеколюбче.

Песнь 5.

**Ирмос:** Вскую мя отринул еси, \* от лица Твоего Свете незаходимый, \* и покрыла мя есть чуждая тьма окаяннаго? \* Но обрати мя, и к свету заповедей Твоих, \* пути моя направи, молюся.

Представ Лазареву гробу Человеколюбче, сего призвал еси, и жизнь подал еси: яко жизнь сый безсмертная человеком всем, яко Бог будущее прообразуя яве воскресение.

Связан ногама Лазарь хождаше, чудо в чудесех: ибо болий явился возбраняющего укрепляяй и Христос: Егоже слову вся раболепно служат, яко Богу и Владыце работающа.

Мертва смердяща Лазаря воздвигнувый Христе четверодневна, возстави мя умерша ныне грехи моими, и положена в рове, и темней сени смертней, и яко благоутробен избави и спаси мя.

Иный, ирмос тойже.

**Ирмос:** Вскую мя отринул еси, \* от лица Твоего Свете незаходимый, \* и покрыла мя есть чуждая тьма окаяннаго? \* Но обрати мя, и к свету заповедей Твоих, \* пути моя направи, молюся.

Отцу славу подая, яко не богопротивный был еси моляся, предстоящий уверяя народ Долготерпеливе, и благодарение Твоему Отцу принося, повелением воздвизаеши Лазаря.

О гласа Боговещаннаго, и Божественныя силы, Спасе державы Твоя! Еюже адова врата всеядныя смерти сокрушил еси: но исхити мя от страстей моих, якоже прежде четверодневна Твоего друга Лазаря.

Слава: Молитвами Лазаря, Марфы же и Марии, нас сподоби зрителей быти Креста и страстей Твоих Господи, и светоносицы дней и царицы Воскресения Твоего Человеколюбче.

И ныне, Богородичен: Матернее дерзновение к Сыну Твоему имущи Пречистая, сроднаго промышления о нас не презри, молимся, яко Тя едину христиане ко Владыце умилоствление благоприятное предлагаем.

**Катавасия:** Вскую мя отринул еси, \* от лица Твоего Свете незаходимый, \* и покрыла мя есть чуждая тьма окаяннаго? \* Но обрати мя, и к свету заповедей Твоих, \* пути моя направи, молюся.

Отселе начинается четверопеснец господина Космы.

Ирмосы по дважды, тропари на 12.

Песнь 6.

**Ирмос:** Иону в ките Господи единого вселил еси: \* мене же связаннаго мрежами вражиями, \* яко от тли онаго, спаси.

Любовь Тебе в Вифанию Господи отведе к Лазарю, и сего уже смердяща воскресил еси яко Бог, и от уз адовых спасл еси.

**Марфа** убо отчаяшесе Лазаря, яко виде четверодневна, Христос же истлевшаго воскреси яко Бог, и к жизни престаи глаголом.

**Иный, Иоанна монаха. Глас тойже.**

**Ирмос: Очисти мя Спасе, \* многа бо беззакония моя, \* и из глубины зол возведи, молюся: \* к Тебе бо возопих, и услыши мя, \* Боже спасения моего.**

**Бог** сый истинный, Лазарево ведал еси успение, и сие учеником Твоим провозвестил еси, уверяя Владыко Божества Своего неопредельное действо.

**Плотию** описан сый Неописанный, в Вифанию пришед, яко Человек Владыко слезиши над Лазарем, яко Бог же хотя воскрешаеши четверодневнаго.

**Катавасия: Очисти мя Спасе, \* многа бо беззакония моя, \* и из глубины зол возведи, молюся: \* к Тебе бо возопих, и услыши мя, \* Боже спасения моего.**

**Кондак, глас 2.**

**Подобен: Вышних ища:**

**Всех** радость Христос, истина, свет, \* живот, и мира воскресение, \* сущим на земли явися Своею благостию, \* и бысть образ воскресения, \* всем подая Божественное оставление.

**Икос: Учеником** Создатель всех предвеща, глаголя: братия и знаемии, наш друг успе, сими предглаголя и уча, яко вся веси, яко Создатель всех. Идем убо, и увидим странное погребение, и рыдание Мариино, и Лазарев гроб узрим: тамо бо хошу чудодействовати, совершая Креста предначинание, и всем подая Божественное оставление.

**Синаксарий.**

**Стих: Рыдаеши** Иисусе, сие смертнаго существа:

**Стих: Оживляеши** друга Твоего, сие Божественныя крепости.

**В** тойже день востание празднуем святаго и праведнаго друга Христова Лазаря Четверодневнаго. Сей еврейн убо бяше родом, фарисей же ересию, и сын якоже негде обретесе, фарисеа сый Симона, от Вифании веси происходя. Господу же нашему Иисусу Христу по земли творящу хождения о спасении рода нашего, и сице в содружество ему соединяется. Понеже бо к Симону Христос часто беседоваше, аки и тому о воскресении мертвых zelo молящуся, и к дому его приходяше многажды, Лазарь в свойство возлюбляется: не тойже един, но и сестре его две, Марфа яве и Мариа. Уже бо спасительной страсти приближающейся, елма подобаше воскресения таинству известнее уверитися. Бяше убо пребывая Иисус об он пол Иордана, первее Иаирова отрочица, и вдовича сына воскресив из мертвых. Друг же его Лазарь недугом тяжким объят быв, умре. Иисус убо и не сый тамо, учеником глаголет: Лазарь друг наш успе. И мало паки престав, Лазарь, рече, умре. Приходит убо в Вифанию, Иордан оставль, от сестр его возвещен быв. Разстоит же от Иерусалима Вифания аки стадий пятнадцать. И предусретосте сестре Лазареве, глаголюще: Господи, аще бы еси был zde, не бы умерл наш брат: но и ныне аще Тебе хотительно, воздвигнеши и, можеши бо. вопрошает же народа Иисус, где положисте его? И абие вси предыдаху на гроб. И камени взяту бывшу, Марфа глаголет: Господи, уже смердит, четверодневен бо есть. Помолився Иисус, и слезы над лежащаго испустив, гласом

велиим воззва: Лазаре гряди вон. И абие умерый изыде: и разрешен быв отыде в дом. Сие странное чудо на зависть воздвизает еврейския люди, и на Христа возбешаются: Иисус же паки уклонься отыде. Архиереи же и Лазаря убити помышляху, зане мнози его зряще ко Христу прилагахуся. Но он мыслимая разумев, к Кипрскому острову избегает, и тамо пребывая, послезде от апостолов архиерей показуется Китейского града. Добре же и боголюбезне пожив, по тридесятолетном времени ожития своего, умирает паки, и таможде погребается, многая чудеса содеяв. Глаголется же, по ожитии ничесоже ясти кроме услаждающаго. И яко его омофор Пречистая Божия Мати, Своима уготовальши рукама, ему дарова. Сего честныя и святыя мощи, премудрейший царь Лев, от некоего видения Божественнейшаго, оттуду пренес, в созданном от него в Константинограде, во имя сего святого храма, честно и многоценно полагает, одесную в храм входяще, в противной священному олтарю стене: и ныне еще пребывают честныя его мощи, неизреченное некое благовоние совершающе. Праздноватися же в настоящий день вчинися его востание, зане святии и богоноснии отцы наши, паче же святии апостоли, по четыредесятодневнем посте за очищение, святыя страсти Господа нашего Иисуса Христа хотяще жрети, понеже сие чудо начало и вину наипаче обретоша иудейскаго на Христа неистовства, посему зде преестественное сие чудо положиша. Еже убо евангелист Иоанн сам списует, яко другим евангелистом оставльшим сие: яве еще жив бе Лазарь и видимь. Глаголется убо, яко и сего ради самаго и прочее списася Евангелие: и яко ничесоже о безначальном Рождестве Христовем друзии воспомянуша. Се бо бяше искомое уверитися, яко Сын Божий и Бог бе Христос, и яко воскрес, и воскресение будет мертвым: еже Лазарем паче уверяется. Ничтоже от еже во аде Лазарь, рече: или яко не оставлено бысть видети яже тамо, или видевшу молчати о сих повелено бысть. Отселе и всяк человек ныне умерый, Лазарь глаголется, и гробная одежда паки лазарома нарицается, гадательствующему слову, еже в память перваго Лазаря приходити. Аще бо он словом Христовым воста и оживе паки, тако и сей, аще и умре, в последней трубе востав, вечно жити будет. Молитвами друга Твоего Лазаря, Христе Боже, помилуй нас, аминь.

### Песнь 7.

**Ирмос:** Отроцы еврейстии \* в пещи попраша пламень дерзновенно, \* и на росу огонь преложиша, вопиюще: \* благословен еси Господи Боже во веки.

Прослезився яко человек Щедре, воскресил еси яко Бог суцаго во гробе, и разрешся от ада Лазарь зываше: благословен еси Господи Боже во веки.

Изыде повойми обвязан, пропасти ада же и тьмы убег Владычним словом, Лазарь зывая: благословен еси Господи Боже во веки.

### Иный.

**Ирмос:** От Иудеи дошедше отроцы, в Вавилоне иногда, \* верою Троическою пламень пещный попраша поюще: \* отцев Боже благословен еси.

**Над** другом прослезився, Марфины Щедре слезы утолил еси, и страстию вольною отъял еси от лица людей Твоих всякую слезу: отец наших Боже благословен еси.

**Живота** сокровище, мертвого яко от сна Спасе воздвигл еси, и словом адову утробу расторгнув, воскресил еси поюща: отец наших Боже благословен еси.

**Мертвеца** смердяща, связана повойми, Владыко, воздвигнул еси, и мене связаного пленицами прегрешений, возстави поюща: отец наших Боже благословен еси.

**Катавасия:** От Иудеи дошедше отроцы, в Вавилоне иногда, \* верою Троическою пламень пещный попраша поюще: \* отцев Боже благословен еси.

### Песнь 8.

**Ирмос:** Муסיкийским органом согласующим, \* и людем безчисленным покланяющимся образу в Деире, \* три отроцы не повинувшися, \* Господа воспеваху, \* и славословяху во вся веки.

**Яко** Пастырь агнца взыскал еси, от волка лютаго губителя восхитив, растлевша обновил еси, поюща Тебе: пойте и превозносите во вся веки.

**Яко** Человек гроба взыскал еси, мертвого яко Содетель воскресил еси, повелением Твоим Владычним: Егоже ад ужасеся, вопиюща Тебе: пойте и превозносите во вся веки.

### Иный.

**Ирмос:** Царя Небеснаго, \* Егоже поют вои ангельстии, \* хвалите и превозносите во вся веки

**Вопрошаеши** убо яко Человек, яко Бог же воскрешаеши словом четверодневнаго. Темже Тя поем и превозносим во вся веки.

**Тебе** благоразумно Владыко, якоже должное Мариа приношает миро, воспевающи во вся веки.

**Призываеши** убо яко Человек Отца, яко Бог же Лазаря воздвизаеши. Темже Тя поем Христе во веки.

**Хвалим, благословим, покланяемся Господеви, поюще и превозносяще во вся веки.**

**Катавасия:** Царя Небеснаго, \* Егоже поют вои ангельстии, \* хвалите и превозносите во вся веки.

**Честнейшая не стихословится.**

### Песнь 9.

**Ирмос:** Чистую славно почтим, людие Богородицу, \* огонь Божества приимшую \* во чреве неопально, \* песньми величаем.

**Людие** видевши ходяща мертвеца четверодневна, удивившися чудеси, вопияху Избавителю, Бога Тя в песнях величающе.

**Предуверяя** славное востание Твое, о Спасе мой, мертва четверодневна, из ада свободяеши Лазаря, песньми Тя величающа.

### Иный.



**Ирмос: Воистинну Богородицу \* Тя исповедуем \* спасеннии Тобою Дево Чистая, \* с безплотными лики \* Тя величающе.**

Почитая Твоего Отца, и показуя, яко не богопротивен еси, молитву дееши Христе, самовластно воздвиг четверодневнаго.

Из гроба четверодневнаго Лазаря воздвизаеши, тридневнаго Христе Твоего востания, всеистинаго всем показуя сведетеля.

Ходиши, и слезиши, вещаеши же Спасе мой, человеческое показуя Твое действие: Божественное же являя, воздвизаеши Лазаря.

Содеял еси неизреченно, Владыко Спасе мой, по обою двою Твоею естеству, самовластною волею спасение мое.

**Катавасия: Воистинну Богородицу \* Тя исповедуем \* спасеннии Тобою Дево Чистая, \* с безплотными лики \* Тя величающе.**

Таже на глас 1: Свят Господь Бог наш. [Трижды].

Ексапостиларий самогласен,

Словом Твоим, Слове Божий, Лазарь ныне возкачет к житию паки потек, и с ветвьми людие Тя державне почитают, яко в конец погубиши ад смертию Твоею. [Дважды]

Слава, и ныне:

Подобен: Единожды:

Лазарем тя Христос уже разрушает смерти, и где твоя аде победа? Вифании плач ныне на тебе преставляется, вси ветви победы Тому принесем.

На хвалитех поставим стихов 8, и поем стихирны самогласны, глас 1.

Стих: Сотворити в них суд написан.

Воскресение и жизнь человеком сый Христе, \* гробу Лазареву предстал еси, \* уверяя нам два существа Твоя Долготерпеливе, \* яко Бог и Человек от Чистыя Девы пришел еси. \* Якоже бо Человек вопрошал еси: \* где погребесе? \* И якоже Бог воскресил еси \* живоносным мановением четверодневнаго.

Лазаря умерша четверодневнаго \* воскресил еси из ада Христе, \* прежде Твоя смерти, \* потряс смертную державу, \* и едином любимым, \* всех человек провозвещаая из тли свободение. \* Темже покланяющесе Твоей всеильней власти вопием: \* благословен еси Спасе, помилуй нас.

Марфа и Мариа Спасу глаголасте: \* аще бы zde был еси Господи, \* не бы умерл Лазарь: \* Христос же воскресение усопших, \* сего уже четверодневнаго из мертвых воскресил: \* приидите вси вернии, \* Сему поклонимся грядущему во славе, спасти души наша.

Божества Твоего Христе, \* подавая учеником Твоим образ, \* в народех смирял еси Себе, \* утаитися хотя. \* Темже апостолом яко проведец Бог, \* Лазареву смерть предрек еси. \* В Вифании же присутствуяй людем, \* друга Твоего гроба не неведый, \* уведети вопрошал еси яко Человек. \* Но Тобою четверодневен воскресый, \* Божественную Твою державу яви: \* всеильне Господи слава Тебе.

Глас 4: Четверодневна воздвиг еси друга Твоего Христе, \* и Марфино и Мариино рыдание утолил еси: \* показуя всем, яко Ты еси вся совершаая

Божественною силою, \* самовластным хотением. \* Емуже херувими вопиют  
непрестанно: \* осанна в вышних, \* благословен еси над всеми Боже, слава Тебе.

**Марфа** Марии вопияше: \* Учитель предстоит, и глашает тя, приступи. \* Она  
же скоро пришедши, \* идеже бе стоя Господь, \* и видевши возопи, падши  
поклонися, \* пречистей нозе Твои облобызаючи, глаголаше: \* Господи, аще бы  
еси zde был, \* не бы убо умерл брат наш.

**Глас 8: Стих:** Воскреси Господи Боже мой, да вознесется рука Твоя: не  
забуди убогих Твоих до конца.

**Лазаря** умерша в Вифании, \* воздвигл еси четверодневна: \* токмо бо престал  
еси гробу, \* глас живот умершему бысть, \* и воздохнув ад отрешил страхом. \*  
Велие чудо, \* многомилостиве Господи слава Тебе.

**Стих:** Исповемся Тебе Господи всем сердцем моим, повем вся чудеса Твоя.

**Якоже** рекл еси Господи Марфе: \* Аз есмь Воскресение, \* делом слово  
исполнил еси, \* из ада воззвав Лазаря: \* и мене Человеколюбче мертва страстьми,  
\* яко сострадательн воскреси, молюся.

**Слава, глас 2:**

**Велие** и преславное чудо совершися днесь, \* яко мертвеца четверодневнаго, \*  
из гроба Христос возгласив воздвиже, \* и друга призва: \* славословим Его яко  
преславна, \* да молитвами праведнаго Лазаря \* спасет души наша.

**И ныне:** Преблагословенна еси, Богородице Дево:

**Таже, Славословие великое, и отпуст.**

## **В СУББОТУ СВЯТАГО И ПРАВЕДНАГО ЛАЗАРЯ НА ЛИТУРГИИ**

Блаженна, песнь 3-я и 6, на 8:

**Д**ва предлагая действия Твоя, показал еси существ Спасе сугубство: Бог бо еси и Человек.

**Б**ездна сый разума, Ты вопрошаеши: где положиши мертвый? хотя воскресити Животодавче лежащаго.

**М**еста преходяй яко быв Человек, явился еси описан, исполняя всяческая, яко Бог неописанный.

**Л**азаря воздвигл еси Божественным Христе глаголом: и мене многими прегрешеньми умерша возстави, молюся.

**Л**юбовь Тебе в Вифанию Господи отведе к Лазарю, и сего уже смердяща воскресил еси яко Бог, и от уз адовых спасл еси.

**М**арфа убо отчаяшеся Лазаря, яко виде четверодневна, Христос же истлевшаго воскресил яко Бог, и к жизни престаил глаголом.

**Слава:** **Б**ог сый истинный, Лазарево ведал еси успение, и сие учеником Твоим провозвестил еси, уверяя Владыко Божества Своего неопредельное действо.

**И ныне:** **П**лотию описан сый Неописанный, в Вифанию пришед, яко Человек Владыко слезиши над Лазарем, яко Бог же хотя воскрешаеши четверодневнаго.

**По входе Тропарь Празднику. Глас 1:**

**Общее воскресение** \* прежде Твоя страсти уверяя, \* из мертвых воздвигл еси Лазаря Христе Боже. \* Темже и мы яко отроцы победы знамения носяще, \* Тебе победителю смерти вопием: \* осанна в вышних, благословен Грядый во имя Господне.

**Слава, и ныне, Кондак, глас 2.**

**В**сех радость Христос, истина, свет, \* живот, и мира воскресение, \* сущим на земли явися Своею благодатию, \* и бысть образ воскресения, \* всем подая Божественное оставление.

**Вместо Трисвятаго поем:** Елицы во Христа крестистесь, во Христа облекостесь, аллилуиа.

**Прокимен, глас 3:** Господь просвещение мое, и Спаситель мой, кого убоюся?

**Стих:** Господь защититель живота моего, от кого утрашуся?

**Апостол ко Евреом, зачало 333, от полу. [Евр. 12, 28 – 13, 8.]**

**Б**ратие, царство непоколебимо приемлюще, да имамы благодать, еюже служим благоугодно Богу с благоговением и страхом, ибо Бог наш огонь поядаяй есть. Братолюбие да пребывает. Страннолюбия не забывайте, тем бо не ведяще неции странноприяща ангелы. Поминайте юзники, аки с ними связаны: озлобляемая, аки и сами суще в теле. Честна женитва во всех, и ложе нескверно, блудником же и прелюбодеем судит Бог. Не сребролюбцы нравом, довольни

сущими. Той бо рече: не имам тебе оставити, ниже имам от тебе отступить. Яко дерзающим нам глаголати: Господь мне помощник, и не убоюся, что сотворит мне человек? Поминайте наставники ваша, иже глаголаша вам слово Божие, иже взирающе на скончание жителства, подражайте вере их. Иисус Христос вчера и днесь, Тойже и во веки.

**Аллилуиа. глас 5: Господь воцарися, в лепоту облечеса.**

**Стих: Ибо утверди вселенную, яже не подвижится.**

**Евангелие от Иоанна, зачало 39. [Ин. 11, 1 – 45.]**

**Во** время оно, бе некто боля Лазарь от Вифании, от веси Мариины и Марфы сестры ея. Бе же Мария помазавшая Господа миром и отершая нозе Его власы своими, еяже брат Лазарь боляше. Посласте убо сестре к Нему, глаголюще: Господи, се, еяже любиши, болит. Слышав же Иисус рече: сия болезнь несть к смерти, но о славе Божии, да прославится Сын Божий ея ради. Любяше же Иисус Марфу и сестру ея и Лазаря. Егда же услыша, яко болит, тогда пребысть на немже бе месте два дни. Потом же глагола учеником: идем во Иудею паки. Глаголаша Ему ученицы: Равви, ныне искаху Тебе камением побити Иудее, и паки ли идеши тамо? Отвеща Иисус: не два ли надесея часа еста во дни? Аще кто ходит во дни, не поткнется, яко свет мира сего видит, аще же кто ходит в нощи, поткнется, яко несть света в нем. Сия рече и посем глагола им: Лазарь друг наш успе, но иду, да возбужу его. Реша убо ученицы Его: Господи, аще успе, спасен будет. Рече же Иисус о смерти его, они же мнеша, яко о успении сна глаголет. Тогда рече им Иисус не обинуяся: Лазарь умре, и радуюся вас ради, да веруете, яко не бех тамо, но идем к нему. Рече же Фома, глаголемый Близнец, учеником: идем и мы, да умрем с ним. Пришед же Иисус, обрете его четири дни уже имуща во гробе. Бе же Вифания близ Иерусалима, яко стадий пятнадцать, и мнози от Иудей бяху пришли к Марфе и Марии, да утешат их о брате ея. Марфа убо егда услыша, яко Иисус грядет, срете Его, Мария же дома седяше. Рече же Марфа ко Иисусу: Господи, аще бы еси zde был, не бы брат мой умер, но и ныне вем, яко елика аще просиши от Бога, даст Тебе Бог. Глагола ей Иисус: воскреснет брат твой. Глагола Ему Марфа: вем, яко воскреснет в воскрешение, в последний день. Рече же ей Иисус: аз есмь воскрешение и живот. Веруяй в Мя, аще и умрет, оживет, и всяк живый и веруяй в Мя не умрет во веки. Емлещи ли веру сему? Глагола Ему: ей, Господи, аз веровах, яко Ты еси Христос Сын Божий, иже в мир грядый. И сия рекши, иде и пригласи Марию сестру свою тай, рекши: Учитель пришел есть и глашает тя. Она же яко услыша, воста скоро и иде к Нему. Не уже бо бе пришел Иисус в весь, но бе на месте, идеже срете Его Марфа. Иудее же убо сущии с нею в дому и утешающе ю, видевше Марию, яко скоро воста и изыде, по ней идоша, глаголюще, яко идет на гроб, да плачет тамо. Мария же яко прииде, идеже бе Иисус, видевши Его, паде Ему на ногу, глаголющи Ему: Господи, аще бы еси был zde, не бы умер мой брат. Иисус убо, яко виде ю плачущую и пришедшую с нею Иудей плачущя, запрети духу и возмутися Сам и рече: где положисте его? Глаголаша Ему: Господи, прииди и виждь. Прослезися Иисус. Глаголаху убо Жидове: виждь, како любяше его. Нецыи же от них реша: не можаше ли Сей, отверзый очи слепому, сотворити, да и сей не умрет? Иисус же паки претя в себе, прииде ко гробу. Бе же пещера, и камень лежаше на ней.

Глагола Иисус: возьмите камень. Глагола Ему сестра умершаго Марфа: Господи, уже смердит, четверодневен бо есть. Глагола ей Иисус: не рех ли ти, яко аще веруеши, узриши славу Божию? Взяша убо камень, идеже бе умерый лежа. Иисус же возведе очи горе и рече: Отче, хвалу Тебе воздаю, яко услышал еси Мя. Аз же ведех, яко всегда Мя послушаеши, но народа ради стоящаго окрест рех, да веру имут, яко Ты Мя послал еси. И сия рек, гласом великим воззва: Лазаре, гряди вон. И изыде умерый, обязан рукама и ногама укромом, и лице его убрусом обязано. Глагола им Иисус: разрешите его и оставите ити. Мнози убо от Иудей пришедшии к Марии и видевше, яже сотвори Иисус, вероваша в Него.

**Причастен:** Из уст младенец, и ссущих совершил еси хвалу.

**Аллилуиа, трижды.**

На трапезе учреждаемъ варением со елеем, аще же и икру имамы, да дастся коемуждо брату по три онгии, и вино пием.

Подобает ведати: Аще храм праведнаго Лазаря: по обычной кафисме полиелей: Величание святительское, и псалом: Услышите сия вси языцы: Таже седален иже по 3-й песни. И житие святаго Лазаря, от Никифора Ксанфоупа написано. Степенна, антифон 1-й, 4-го гласа. Прокимен: Честна пред Господем: Стих: Что воздам Господеви: Всякое дыхание: Евангелие от Иоанна, зачало 36: Аз есмь дверь: псалом 50. Стихира, глас 6: Господи, глас Твой разруши: Каноны два, на 14: и катавасия 2-го канона. По 3-й песни седален праздника. По 6-й песни кондак: Всех радость: И икос. И прочее последование якоже указася.